


Medaglias èn già sin maisa

GION NUTEGN STGIER/FMR

L'organisaziun da la Festa da tir chantunala 2024 en las Vals dals sid dal Grischun va tenor plans. Sajettà vegn en 15 lieus e plaschaivel è che per mintga comité d'organisaziun local è stà pussaivel da chattar in president.



En 14 mais vegn l'emprim culp a dar l'avertura da la Festa da tir chantunala 2024 en gist tschintg regions dal sid dal Grischun. L'occurrenza entschaiva ils 13 da zercladur 2023 e vegn ad esser a la fin ils 30 da zercladur 2023 cun ils tirs finals per eruir ils retgstiradurs da la festa èn da mintga categoria. Alla testa da la Festa da tir chantunala 2024 stat l'anterior president dal cussegl grond, Martin Aebli. El vegn sustegnì da set ulteriuras personas che fan er part al comité d'organisaziun principal.

Be anc ina Festa da tir chantunala sper la grischuna

A Zuoz ha gi lieu l'emprima radunanza generala da las uniuns purtadras da la Festa da tir chantunala 2024 en las Vals grischunas dal sid. Tar quella ha il comité d'organisaziun er pudì preschentar las medaglias, ellas ch'èn gist frestg or dal manaschi da gravura d'Urs Stähli a Münchwillen TG ed èn ussa sin maisa. L'idea dal logo cun il tschess barbet è vegnida d'Attilio Tam, il vicepresidente dal comité d'organisaziun. Per la grafica dal logo è lura stà responsabel il biro da marketing PR 24 da Schiers/Aschera. Realitad è er ch'ils sis sponsurs principalas èn avant maun. Tuttina vegn la lavur da chattar ulteriours sponsurs ed ina rotscha premis natirals (passa 800) ad esser in grond pensum na be per il comité d'organisaziun, mabain er per mintgin dals 15 comités locals inclus tiradurs e tiraduras da las 15 uniuns. Cumpari è er già il cudeschet pitschen cun tut ils 60 stetgs da tir èn quatter categorias. La pagina d'internet (ksfgr24.ch) è lura er già en funcziun ed er per dir uschia dal «Newsletter» vegn già fatg pulit diever. Segir vegn la Festa da tir chantunala ad esser in magnet per attrir numerus tiradurs e tiraduras en las Vals grischunas dal sid. La raschun è ch'il 2024 ha lieu en Svizra dasper l'occurrenza grischuna da tir be anc la Festa da tir chantunala dal Giura. Auter onns èn quai fin tschintg festas da tir chantunalas. Er turisticmain daventa la Festa da tir chantunala 2024 en il Grischun segir in success cumbineschan bieras uniuns il tir cun er far in excursiun èn las regions nua che vegn sajettà ed er fatg festa.